

ତୀମଥୁଙ୍କ ନିକଟକୁ ପାଉଲଙ୍କ ପ୍ରଥମ ପତ୍ର ତିମତିଦି ଲାକଡୁ ପାଉଲତି ପାର୍ବତୁମ୍ ଆକୁ

ଇୟା ଆକୁତୁ ମାନି ଏସ ବିସୟ୍

ପାର୍ବତୁମ୍ ତିମତି ପ୍ରେରିତ ପାଉଲଦି ମାଣାନ୍ ଖାନି ସିସୁ ତିମତିଦିଙ୍କୁ ରାସ୍ତାମାନାନ୍ । ପାର୍ବତୁମ୍ ତିମତି ଆନାତସୁଗି ପାକାପାକି ୬୨-୬୪ ବାର୍ଷେକ୍ ଜିସୁ କ୍ରିସ୍ତଦି ଜନମ୍ ଝେନ୍‌କା ରାସାତାମାନାତ୍ । ଆଦେଙ୍କୁ ଆବ୍‌ନାତ୍ ଇକା ପାଉଲଦି ଜିବନ୍‌ତି ସାରାସାରି ବେଡା । ପାଉଲଦି ଖାଲେ ତିମତିଦି ପୁରା ମିସାବିଡା ମାର୍‌ଆତ୍ । ଖାନ୍ ଏସ ବେଡାତୁ ତିମତିଦିଙ୍କୁ ମାରିନ୍ ଇଜି ମାନାନାନ୍ ପିଲିପିୟ ୨:୨୨; ୧ ତିମତି ୧:୨, ୧:୧୮ । ଇକା ପାଉଲଦି ମାଣାନ୍ ରାସାତିମାନି ନାଲିଗି ବଇଙ୍କୁ ଲୋଇ ଇକା ଉନ୍‌ଡି । ଆଇ ମୁନ୍‌ଡି ବଇଙ୍କୁ ୨ ତିମତି, ତିତସ, ମାରି ପିଲିମନ ଇକେଙ୍କୁ । ପାର୍ବତୁମ୍ ତିମତିଦୁ ମଣ୍ଡୁଲିଦି ଉପାସନା ବିସୟ୍ ତେବାତାମାନାତ୍ ୨:୧-୧୫ ।

ଇବେନ୍‌ ମଣ୍ଡୁଲିଦି ନେତାରି ଜଗ୍ ବିସୟ୍‌ତାନ୍ ସୁଡ଼କୁନିକା ୩:୧-୧୩ ମାରି ମିସ୍ ଗୁରୁରି ତରିନ୍ ଜାଗାର୍‌ତାଦି ମାଟା ତେବାତାମାନାତ୍ ୧:୩-୧୧, ୪:୧-୫, ୬:୨-୫ । ମଣ୍ଡୁଲି ଲୋଇ ତିମତି ଏଣ୍ଡେସ୍ ନାନି ଉନ୍‌ଡି ନେତା ଆନି ଦର୍‌କାର୍ ଆକା ପାଉଲ ଅଜା କିନି ସିନି ବିସୟ୍‌ତାନ୍ ଝେରନାନ୍ । ପାର୍ବତୁମ୍ ତିମତିଦୁ ଇଲେଇତି ନାରକାଣି ମଣ୍ଡୁଲିଆଙ୍ଗା ପାଣି ସାଲାକିନି ଉଣ୍ଡିଙ୍କୁ ମଣ୍ଡୁଲିଦି ନେତାରିଙ୍କୁ ଏସ ମୁଲ୍ ମାଟା ଝେରନାତ୍ ।

ଇୟା ଆକୁତୁ ମାନି ମୁକ୍ୟ ବିସୟ୍

୧. ପାଉଲ ତିମତିଦିଙ୍କୁ ମାଡ଼ିସ୍‌କିଜି ରାସ୍‌ନିକା ଆରାମ୍ କିତାନ୍ । ୧:୧-୨
୨. ପାଉଲ ତିମତିଦିଙ୍କୁ ମିତ୍ ଝେରନ୍‌ ଗୁରୁରି ତରିନ୍ ଜାଗାର୍‌ତା କିନାର୍ । ୧:୩-୧୧
୩. କ୍ରିସ୍ତଦିମାନୁ ପାଉଲଦି ଦନ୍‌୍ୟବାଦ୍ । ୧:୧୨-୧୯

୪. ପାଉଲ ମଣ୍ଡଳିଦି ସେବା ପାଣି ନି ନେତାରି ବିସୟତାନ୍
ତିମତିଦିଙ୍କ ମାଟା ଝେରନାର । ୨-୩

୫. ତିମତିଦିଙ୍କ ପାଉଲଦି ସାରାସାରି ଝେରନିକା । ୪-୭

୧ ନାନୁ ପାଉଲ, ମା ରକିୟାକର୍ତ୍ତା ମାପୁରୁ ମାରି ଆସାଦିମୁଣ୍ଡା କ୍ରସ୍ତ
ଜିସୁଦି ମାଟା ଇସାବତାନ୍ କ୍ରସ୍ତ ଜିସୁଦି ଅରେନ୍ ପୋକ୍ତିମାନି ସିସୁ,

୨ ✧ ଖାନି ଦାର୍ମୁମାରିସି ତିମତିଦି ଲାକ୍ତୁ ରାସ୍ତିମାନି ଆକୁ :

ବୁବା ମାପୁରୁ ମାରି ମା ପ୍ରବୁ କ୍ରସ୍ତ ଜିସୁଦିମାଣାନ୍ ଦୟା, ସାକା ମାରି
ସାନ୍ତି ମି ଉଣ୍ଡିଆ ଆପିତ୍ ।

ତାଗ୍‌ଲ ସିକିୟା ଉଣ୍ଡିଆ ଜାଗାର୍‌ତା

୩ ନାନ ମାସିଦୋନିଆଦୁ ସନିଞ୍ଜାଲେ ମିଙ୍ଗ୍ ଝେରତିମାରୁଲ
ଇସାବତାନ୍ ମିର ଏପିସ୍ତୁ ମାନଡୁ । ଆବେନ୍ ଆମାକାର୍ ତାଗ୍‌ଲ
ସିକିୟା ଝିନ୍ତୁ ସିଜିନାର୍, ଝାରିଙ୍ଗ୍ ଆବେଟ୍‌ତାନ୍ ସୁପ୍ ଆଦେଙ୍ଗ୍ ଇଜି
ଆଦେସ୍ ସିଦୁ ।

୪ ଝାର୍ ପୁର୍ବେଦି କାତେଙ୍ଗ୍ ନି ପୁର୍ବେଦିତକ୍‌ରାଦାଦାରି ନିରୁଇ ଦାଡି
ତିଆର୍ କିଜିନାର୍ । ଆୟାଝିନ୍ତୁ ଡିସ୍‌ତେଙ୍ଗ୍ ଝାରିଙ୍ଗ୍ ସିକିୟା ସିଦୁ,
ଇରିଙ୍ଗ୍ ଆକା କେବଲ୍ ତାଗ୍‌ଲ ମାଟେଙ୍ଗ୍ ସପ୍‌ନାଡ୍ । ଆମା ନେଗି
ବିସ୍‌ବାସ୍‌ତୁ ମାପୁରୁଦି ବଦା ନେସ୍‌ତେଙ୍ଗ୍ ଆନାଡ୍, ଇୟାଝିନ୍ତୁ ତାନିଙ୍ଗ୍
ବାଦା କିନାଡ୍ ।

୫ ନେଗି ଜିବନ୍, ନେଗି ବୁଦି ମାରି ସଡ୍ ବିସ୍‌ବାସ୍‌ତାନ୍ ଆମା
ଜିବନ୍‌ନୋନିକା ସନାଡ୍, ତାନିଙ୍ଗ୍ ଜାଗାର୍‌ତା କିନି ଉଣ୍ଡିଆ ନେରୁ ନାନ
ଇୟା ଆଦେସ୍ ସିଜିନା ।

୬ ଏସ୍ ଲୋକୁ ଇୟା ମୁକିୟ ବିସୟଆଙ୍ଗ୍ ବାଣାଜି ସୋଲ୍‌ସି ପୁକା
ମାଟେଙ୍ଗ୍ ଆସ୍‌ସି ସାରିବାଣାତା ମାନାର୍ ।

୭ ଝାର୍ ଦାର୍ମୁଗୁରୁ ଆଜି ମାପୁରୁଦି ବିଦି ନିୟମ୍ ଝେରତେଙ୍ଗ୍
ଝାର୍ ଆସାଆନାର୍, ମାଡର୍ ନିଜେଦି ସିକିୟାଦି ଅରଡ୍ ଝାର୍
ବୁଜାଦେଙ୍ଗ୍ ଆଟ୍‌ଏର୍; ଆମା ଝିନ୍ତୁ ବିସୟତାନ୍ ସଡ୍‌ତାନ୍ ନିଜେଦି
ମାଟା ଝେରନାର୍, ଆକା ସଡ୍‌ତାନ୍ ଇନିକା, ଝାର୍ ନେସ୍‌ଏର୍ ।

୮ ମାତ୍ର ନେସ୍ନାଟ୍ ଜେ, ନିୟମ୍ ନେଗେନ୍ତାନ୍ ମାନାଦେଙ୍ଗ୍ ଆବ୍ତିଙ୍ଗ୍, ଆକା ନେଗିକା ।

୯ ମାତ୍ର ମନେ ଇଡ୍‌ଦେଙ୍ଗ୍ ଆନାତ୍, ଇୟା ନିୟମ୍ ଦାମ୍‌ଦି ଲୋକା ଉଣ୍ଡିଙ୍ଗ୍ ଆଏଡ୍ । ନିୟମ୍‌ତିଙ୍ଗ୍ ମାନାଇ ପାପିଦିଲୋକା ଉଣ୍ଡିଙ୍ଗ୍ ଆକା ତିଆର୍ ଆତାମାନାତ୍ । ଆମାକାର୍ ତାଗଇକାର୍, ଆମାଝାରିଙ୍ଗ୍ ମାପୁରୁଙ୍ଗ୍ ତିୟେଲ୍ ସିଲେ, ଆମାକାର୍ ପାପ୍ ତାଗଇପାଣିଦୁ ମିସାତାମାନାର୍, ଆମାଝାରିଙ୍ଗ୍ ଦାମ୍ ନି ସାନ୍ତିଜିବନ୍ ସିଲେଡ୍, ଆମାକାର୍ ବୁବାୟାୟ୍‌ଜେ ସାୟାମାର୍‌ଗାତାକ୍‌ଡେଙ୍ଗ୍ ତିୟେଲ୍ ଆଏର୍; ଲୋକାଙ୍ଗ୍ ସାୟାମାର୍‌ଗାତାକ୍‌ନିକା,

୧୦ ଲାଲାୟ୍‌ଆନି, ଲୋକାଙ୍ଗ୍ ଡଙ୍ଗାକିନିକାର୍ ମାରି ମିର୍ ମାଟା ଝେରଡେଙ୍ଗ୍ ଆମାକାର୍ ଅବ୍ୟାସ୍, ମିର୍ ସାକି ସିନାର୍ ଆମାକାର୍ ଝିଜୁ ସଡ୍‌ସିକିୟାଦୁ ବିରୁଦ୍ କିନାର୍, ଝାରି ଉଣ୍ଡିଙ୍ଗ୍ ନିୟମ୍ ନେଗିକା ।

୧୧ ଗୌରବ୍‌ମୟ୍ ଦନ୍ୟ ମାପୁରୁଦି ନେଗି କାବୁର୍ ପ୍ରଚାର୍ କିନି ଦାଇଡ୍ ନା ମୁସ୍‌କୁ ସିଆୟ୍‌ଆତା ମାନାତ୍ ।

ମାପୁରୁଦି ଦୟା ଉଣ୍ଡିଙ୍ଗ୍ ଦନ୍ୟବାଦ୍

୧୨ ନା ଦାଇଡ୍ କିଦେଙ୍ଗ୍ ନାଙ୍ଗ୍ ଦୟା କିତିମାନିଙ୍ଗ୍ ମା ପ୍ରବୁ ଜିସୁ କ୍ରିସ୍ତଙ୍ଗ୍ ଦନ୍ୟବାଦ୍ ସିଜିନା । ପୁର୍ବେ ନାନ୍ ଝାନିଙ୍ଗ୍ ନିୟା କିଜିମାର୍‌ଆ, ଝାନିଙ୍ଗ୍ କାସ୍ତୁ ନି ଅପମାନ୍ ସିଜିମାର୍‌ହା । ମାରିବା ଝାନ୍ ନାଙ୍ଗ୍ ବିସ୍‌ବାସ୍ ବୁଦ୍ କିଜି ଝାନି ସେବା ଉଣ୍ଡିଙ୍ଗ୍ ଆସ୍‌କିତାମାନାନ୍ ।

୧୩ ☆ମାରିବା ନାନ୍ ପୁର୍ବେ ନିୟା, କାସ୍ତୁସିନିକା ମାରି ଲୋକାଙ୍ଗ୍ ସାୟାମାର୍‌ଗାତାକ୍‌ନିକାନ୍ ମାର୍‌ହା; ମାତ୍ର ନାନ୍ ବିସ୍‌ବାସ୍ କିଇ ଉଣ୍ଡିଙ୍ଗ୍ ନେସ୍‌ଏଣ୍‌ଗା ଆକା ଝିଜୁ କିତାମାର୍‌ହା, କେମା କିଜି ମାପୁରୁ ନା ଉଣ୍ଡିଙ୍ଗ୍ ସାକା ଆତାମାନାନ୍ ।

୧୪ ମାରି, ମା ପ୍ରବୁ ଜିସୁ ମାରି ଦୟା କ୍ରିସ୍ତ ଜିସୁଦି ଝାଲେ ମିସାଜି ବିସ୍‌ବାସ୍ ମାରି ଜିବନ୍‌ନୋନିକା ଆୟାଝାଜା ନା ଉଣ୍ଡିଙ୍ଗ୍ ଅଦିକ୍ ନାଣ୍ ଆତାତ୍ ।

୧୫ ପାପି ଲୋକାଙ୍ଗ୍ ରକିୟା କିନି ଉଣ୍ଡିଙ୍ଗ୍ କ୍ରିସ୍ତ ଜିସୁ ଜଗଡ୍‌ଦୁ ଝାତାନ୍, ଇକା ଉନ୍‌ଡ୍ରି ପୁରା ସଡ୍ ଇୟା ବାକ୍ୟ ବିସ୍‌ବାସ୍ ମାରି

ଝିଜେରେ ମାନାନାରୁ; ଆୟା ପାପି ଲୋକା ଲୋଇରାନ୍ ନାନ୍
ଝିଜେରିମାଣୁକୁ ପେରିକାନ୍ ।

୧୭ ମାତର୍ ନା ଝାଜା ଉନ୍ତ୍ର ପାପି ଉଣ୍ଡିଙ୍ଗ ବା ମାପୁରୁଦି
ଦୟା ମାରି କ୍ରିସ୍ତ ଜିସୁଦି ସାକା ନାଙ୍ଗ ଉନ୍ତ୍ର କାତା କିଜି
ଇଟ୍ତାମାନାତ୍ ଆଇକାର୍ ଏଣ୍ଡେସ୍ ଜିସୁଦିମାନୁ ବିସ୍ବାସ୍ ତିଆର୍ କିଜି
ଏସକାଙ୍ଗଝିଜିଇ ଜିବନ୍ ପୟନାନ୍ ।

୧୮ ଝିଜୁ ଦୁନିଆଦି ତରାଇ, ଝିଜୁଇ, ଝିଜୁଦିନ୍ତି ରାଜା ଅରେନ୍
ମାପୁରୁ ଜେ, ଝାନି ସମ୍ବୁମ ଗୌରବ୍ ଜୁଗ୍ ଜୁଗ୍ ଆପିତ୍ ! ଆମେନ୍ ।

୧୯ ଏ କଡ଼ ତିମତି, ମି ବିସୟତାନ୍ ଆଗ୍ତି ରାସ୍ତିମାନି ଝିଜୁ
ବାବବାଣି ଇସାବତାନ୍ ନାନ୍ ନିଙ୍ଗ ଇୟା ମାଟା ଝେରସିନା, ଏଣ୍ଡେସ୍
ନିନ୍ନୁ ଆୟାଝିଜୁ ବାବବାଣି ସାହାଜ୍ୟଦାନ୍ ନେଗେନ୍ତାନ୍ ଜୁଦ୍ କିଦେଙ୍ଗ୍
ଆଟ୍ଟିଦେର୍;

୨୦ ବିସ୍ବାସ୍ ମାରି ନେଗି ବୁଦି ଆସ୍‌ସୋ ଇତିଆ; ଆକା
ଡିସ୍‌ତାର୍‌ଆକା ଏସଲୋକାଙ୍ଗ୍ ଦାର୍ମ୍ ବିସ୍ବାସ୍ ରୁଙ୍ଗ୍‌ତା ସର୍ହାତ୍
।

୨୧ ଝାରି ମାଣକୁ ହୁମନାୟ ମାରି ଆଲେକ୍‌ଜାଣ୍ଡର୍ ଆଇକାର୍;
ଇୟାକାର୍ ଏଣ୍ଡେସ୍ ସାସନ୍ ପୟଆୟ ମାପୁରୁଙ୍ଗ୍ ନିନ୍ଦା କିଏର୍,
ଇୟାଉଣ୍ଡିଙ୍ଗ୍ ନାନ୍ ଝେରିଙ୍ଗ୍ ସୟତାନ୍ କିୟୁଦୁ ସର୍ପେ କିତା ।

୨

ମଣ୍ଡୁଲିଦି ଉପାସନା ନିୟମ୍

୧ ନାନ୍ ପାର୍‌ତୁମ୍ ଅନୁରୋଦ୍ କିଜିନା, ପାର୍‌ତନା କିନିଝାଲେ,
ଝିଜେରେ ଉଣ୍ଡିଙ୍ଗ୍ ମାପୁରୁମାନୁ ପାର୍‌ତନା କିଦୁ, ମାଡିସ୍‌କିଦୁ ମାରି
ଦନ୍ୟବାଦ୍ ସିଦୁ ।

୨ ଇୟାଝାଜା ଆଇ ସାସନ୍‌କିନିଝାରିଙ୍ଗ୍ ମାରି ରାଜାରିଙ୍ଗ୍ ପାର୍‌ତନା
କିଦୁ, ଏଣ୍ଡେସ୍ ମାପୁରୁଦି ବକ୍ତିଦାନ୍ ସାନ୍ତିଦାନ୍ ତେବାନିକା ମାରି
ଆଇଝାରି ଉଣ୍ଡିଙ୍ଗ୍ ନେଗେନ୍ତାନ୍ ଝେଡିକାଦାନ୍ ଜିନିକା

୩ ଇୟାନାନି ପାର୍‌ତନା ରକିୟା କିନି ମାପୁରୁ ଆଗ୍ତି ଟିକ୍ ନି ଜଗ୍
।

୪ ଝିଜେରେ ଏଣ୍ଡେସ୍ ରକିୟା ମାରି ସଡ୍ ବିସୟତାନ୍ ଜ୍ଞାନ୍
ପୟନାର୍, ଝାନ୍ ଇକା ବଦା କିନାନ୍ ।

୫ ଇରିଙ୍ଗ ଅରେନ୍‌ମାତର୍ ମାପୁରୁ ମାନାନ୍, ମାରି ମାପୁରୁ ମାରି ଲୋକା ଲଇ ଅରେନ୍‌ମାତର୍ ନାଡ଼ମି ମାନାନ୍, ଖାନ୍ କ୍ରିସ୍ତ ଜିସ୍ତ, ଅରେନ୍ ଲୋକ୍;

୬ ଖାନ୍ ଝିଜେରିଙ୍ଗ ମୁକୁଡ଼ାକିନି ଉଣ୍ଡିଙ୍ଗ ନିଜେଦିଙ୍ଗ ଦାନ୍ ସିଜି ଇବେଶାନ୍ ଟିକ୍ ଝେଡ଼ାଦୁ ପାର୍‌ମାଣ୍ ଆତାମାନାଡ଼ ଜେ, ମାପୁରୁ ଝିଜୁ ଲୋକାଙ୍ଗ୍ ସାକ୍ୟ ସିଦେଙ୍ଗ୍ ଇଚ୍ଛା କିନାନ୍ ।

୭ ✧ଆୟା ସଡ଼ ମାରି ବିସବାସତି କାରୁର୍ ଅଣଜିହୁଦିରି ଲାକ୍‌ତୁ ଝେର୍‌ଡେଙ୍ଗ୍ ନାନ୍ ଅରେନ୍ ସିସୁ ମାରି ଗୁରୁ ଖାଜା ଖାତା ମାନା । ନାନ୍ ମିର୍ ଝେର୍‌ଏ, ଆମାକା ଝେର୍‌ସିନା, ଆକା ଝିଜୁ ପୁରା ସଡ଼ ।

୮ ପାର୍‌ତନାଦୁ ମାପୁରୁଦି ଦାମ୍‌ ଲୋକ୍ କିୟ୍ ମୁସ୍‌କୁ ପେର୍‌ଜି ରିସା ନି ସୁରିଝାରଗିଏନ୍‌ଶ୍ଯା ପାରୁତାନା କିପିର୍ ।

୯ ✧ଆଇମେକାଙ୍ଗ୍ ୍ନା ଅନୁରଦ୍, ଖାକୁ ଜାଡୁନ୍ ଆପିଝି । ନାଣ୍ଡଦାରାଦି ଝାଡିଗନ୍ଦା ଆରାନିକା, କୁକୁଟି ରଙ୍ଗ୍ ଉସାଏନଶ୍ଯା ମାରି ବାଙ୍ଗାଁରାମ୍‌ତାନ୍ ନିଜେଦିଙ୍ଗ୍ ତିଆର୍‌ଆଏଶ୍ଯା,

୧୦ ଆଇମେକ୍ ସଡ଼ ପାଣିଦାନ୍ ନିଜେଦି ଦାମ୍‌ବିସୟତି ତରିଝି ।

୧୧ ଆଇମେକ୍ ତିର୍‌ଆଜ ନେଗେନ୍‌ତାନ୍ ସିକିୟା ମାନାନିକା ମାନାଡ଼ ।

୧୨ ଉପଦେସ୍ ସିନିକା ମାରି ଲୋକାଦି ମୁସ୍‌କୁ ସାସନ୍ କିନି ଉଣ୍ଡିଙ୍ଗ୍ ଅଦିକାର୍ ନାନ୍ ଆଇମେକାଙ୍ଗ୍ ୍ସିଏ । ଖାକୁ ତିର୍‌ଆଜ ମାନିଝି ।

୧୩ ଇରିଙ୍ଗ୍ ଆଦମ୍ ପୁର୍ବେ ତିଆର୍‌ ଆତାମାର୍‌ହାନ୍; ତାନେଝେନ୍‌କା ହବାଦି ତିଆର୍‌ କିତାନ୍,

୧୪ ମାରି ଆଗୁଡ଼ି ଆଦମ୍ ଲାଲାୟ୍ ଆଇତିମାରିଙ୍ଗ୍, ଆଇମାନ୍ତୁ ଲାଲାୟ୍‌ଆଜି ପାପ୍ କିଜି ମାପୁରୁଦି ମାଟା ମାନାଏତାଡ଼ ।

୧୫ ମାତର୍ ଖାକୁ ନେଗି ବୁଦିଦାନ୍ ବିସବାସ୍, ଜିବନ୍‌ନୋନିକା ମାରି ପବିତ୍ରଦାନ୍ ତିର୍‌ ତେବାଡିଙ୍ଗ୍, ଖାଦ୍ କଡ଼ ଜନମ୍ କିନି ମାଣ୍ଡୁକ୍ ରକିୟା ପୟ୍‌ନାଡ଼ ।

୩

ମଣ୍ଡୁଲିଦୁ ଦାଇଡ଼

୧ ଇୟା ମାଟା ସତ୍, ପାରତନା କିନି ମଣ୍ଡୁଲିଦୁ ନେତା ଆନି ଉଣ୍ଡିଙ୍ଗ ଆମା ଲୋକ୍ ବଦା କିନାନ୍, ଝାନ୍ ସତ୍ ଉଣ୍ଡି ନେଗି ପାଣି କିଦେଙ୍ଗ୍ ବଦା କିନାନ୍ ।

୨ ☆ମାତର୍ ମଣ୍ଡୁଲିଦିଙ୍ଗ୍ ସୁଡ଼ନ୍ନିକାନ୍ ଇନିଦୋସ୍‌ସିଲି ଲୋକୁ ଆନିକାମାନାଡ଼, ଅରେଡ଼ ଆଇମାଦି କନ୍‌ଲି, ମିର୍ ଇନ୍‌ଇକା, ନେଗିବୁଦି ମାରି ସେବାକିନିକା ଆନି ଦରକାର୍ । ଝାନ୍ କୁଡ଼ାଆଙ୍ଗ୍ ସନ୍‌ମାନ୍‌କିନିକା ଆନିମାନିକା ମାରି ସିକିୟାଦାନ୍ କିଦେଙ୍ଗ୍ ଝାନ୍ ବପୁ ମାନିକାମାନାଡ଼ ।

୩ ଝାନ୍ କାଡ଼ଡୁଣିକାନ୍ ନି ରିସାଦି ଲୋକ୍ ଆଇକା ମାନାଡ଼, ତିର୍ ମାରି ସାନ୍ତିଦି ଲୋକ୍ ଆନିକା ମାନାଡ଼ । ଝାନ୍ ଦନ୍‌ତିଙ୍ଗ୍ ଆସାଇକା ମାନାଡ଼ ।

୪ ନିଜେଦି ଇଲୁପରିବାର୍‌ତିଙ୍ଗ୍ ଝାନ୍ ନେଗେନ୍‌ତାନ୍ ସାଲାକିଦେଙ୍ଗ୍ ଆର୍‌ସିମାନାନ୍ ମାରି ଝାନ୍‌ଙ୍ଗ୍ ସନ୍‌ମାନ୍ ସିଜି ଝାନ୍ ରାଜି ଆନି ଉଣ୍ଡିଙ୍ଗ୍ ଝାନ୍ କଡ଼ର୍ ସିକିୟା ସିନାନ୍ ।

୫ ଆମା ଲୋକ୍ ନିଜେଦି ଇଲୁପରିବାର୍‌ତିଙ୍ଗ୍ ସାଲାକିଦେଙ୍ଗ୍ ଆର୍‌ଏନ୍, ଝାନ୍ ମାପୁରୁଦି ଉପାସକ୍ ମଣ୍ଡୁଲିଦିଙ୍ଗ୍ ଜାଡୁନ୍ ଅନାନ୍ ଏଣ୍ଡେସ୍ ?

୬ ଝାନ୍ ବିସ୍‌ବାସ୍‌ତୁ ପୁରା ତେବାନିକା ମାନାଡ଼; ଆଇତିଙ୍ଗ୍ ସୟତାନ୍ ଝାଜା ଗର୍ବ କିଜି ଦଣ୍ଡ ପୟ୍‌ନି ମାଟା ମାନାଡ଼ ।

୭ ମଣ୍ଡୁଲି ଆତେରେ ଲୋକାମାନୁବା ଝାନ୍ ଅରେନ୍ ସନ୍‌ମାନ୍ ପଇନି ଲୋକ୍ ଆନିକା ମାନାଡ଼, ଉସାସ୍‌ତାନ୍ ସୟତାନ୍‌ତି ଉରିଦୁ ଆର୍‌ଜି ଝାନ୍ ଏଣ୍ଡେସ୍ ଅପ୍‌ମାନ୍ ଆନାନ୍ ।

ମଣ୍ଡୁଲିଦୁ ସାହାଜ୍ୟକିନିକାନ୍

୮ ମଣ୍ଡୁଲିଦି ସେବାକିନିକାର୍ ବା ନେଗିଗୁଣ୍ଡୁ ମାରି ନେଗିପାଣିକିଦେଙ୍ଗ୍ ଆନି ଦରକାର୍ । ଝାନ୍ କାଡ଼ଡୁଣିକାନ୍ ନି ଦନ୍‌ତିଙ୍ଗ୍ ଆସାନିକାର୍ ଆଏର୍ ମାନାଡ଼ ।

୯ ମା ଦାମ୍‌ ବିସ୍‌ବାସ୍‌ତି ଝେର୍‌ଆୟ୍‌ଆତିମାନି ମାଟେଙ୍ଗ୍‌ଞ୍ଜି ଝାନ୍ ନେଗି ବୁଦିଦାନ୍ ତାଟ୍‌ତାନ୍ ବିସ୍‌ବାସ୍ କିଜିମାନାଡ଼ ।

୧୦ ମଣ୍ଡଳିଦି ପାଣି କିଦେଈ ଅଦିକାର ପୟନି ଆଗଡ଼ିନେ ଖାରିଙ୍ଗ ବା ପରିକା କିପିର । ଇୟା ପରିକାଦୁ ନିୟା ସିଲିକାନ ଇଜି ତରିଡ଼ିଙ୍ଗନେ ଖାର ସେବା ପାଣିକିଦେଈ ଅଦିକାର ପୟନାର ।

୧୧ ଖାରି ଆଡ଼ସିକ ବା ନେଗିଗୁଣ୍ଡୁ ଆନେମାନେ ମାରି ଆଇ ଲୋକା ସୁରି ମାଟା ଖେରଇକା ମାନାଡ଼ । ଖାକୁ ମିଡ଼ଖେରନିକା ମାରି ଖିଜୁ ବିସୟତୁ ବିସବାସ ଆନିକା ଦରକାର ।

୧୨ ସେବାକିନିକାର ଅରେଡ଼ ଆଇମାଦି କନ୍‌ଲି ଆପିନ୍, ମାରି ନିଜେଦି ଇଲୁପରିବାରଡ଼ିଙ୍ଗ ମାରି କଡ଼ରିଙ୍ଗ ନେଗେନ୍‌ତାନ୍ ସାଲାକିଦେଈ ଆଡ଼ସିନିକା ମାନାନ୍ ।

୧୩ ସେବାକିନି ଇସାବତାନ୍ ଆମାକାର ନେଗିପାଣି ତରନାର, ଖାର ମଣ୍ଡଳିଦୁ ସନ୍‌ମାନ୍ କିନାର ମାରି କ୍ରିସ୍ତ ଜିସୁଦି ବିସବାସ ବିସୟତାନ୍ ଡିଲାଏଣ୍‌ଗା ନିଜେଦି ମାଟା ଖେରଡେଈ ଆଡ଼ନାର ।

ବିସବାସତି ସଡ଼ ବିସୟ

୧୪ ଇୟା ଆକୁ ରାସନି ଖାଲେ, ଦାପ୍ରେ ମିଙ୍ଗ ସୁଡ଼କୁ ଖାନି ଉଣ୍ଡିଙ୍ଗ ନାନ୍ ଆସା କିଜିନା,

୧୫ ମାତର ଜଦି ନାନ୍ ଖାନିକା ଖେଡ଼ା ଆନାଡ଼, ଜିବନ୍‌ମାନି ମାପୁରୁଦି ଇଲୁଖାଜା ଇୟା ପାରତନାକିନି ମଣ୍ଡଳିଦୁ ମାଙ୍ଗ ଏଣ୍ଡେସ୍ ଜିଦେଈ ଆନାଡ଼, ଇୟା ଆକୁ ଦାନ୍ ଆକା ମିର ନେସଡେଈ ଆଡ଼ନିଦେର୍ । ଇୟା ମାପୁରୁଦି ମଣ୍ଡଳି ନେ ଖିଜୁଦିନ୍‌ଡି ସଡ଼ତି ମୁଣ୍ଡା ନି କୁନାଦି ରାସତିକା ।

୧୬ ମା ଦାମ୍‌ବିସବାସତି ଇୟା ପେରିବିସୟ ଏନ୍ ମାନାଦେଈ ଆଡ଼ଏନ୍ :

କ୍ରିସ୍ତ ଲୋକା ମେନ୍‌ଲ ଆସସି ରେତାତାନ୍,

ମୁସକୁପୁରତି ଦୁଡ଼କୁ ମାଣ୍ଡୁକୁ ତରାୟଆତାନ୍,

ଆମାଦୁ ଦାମ୍‌କ ଇଜି ପାରମାଣ୍ କିଆୟାଆତାନ୍,

ଖିଜୁଜାତିଦି ଲଇ ଖାନି ନେଗିକାବୁର୍ ପ୍ରଚାର ଆତାଡ଼,

ସାରାଦୁନିଆଦି ଖିଜୁତରିନ୍ ଖାନ୍ ବିସବାସ ଆଜି

ଗୌରବତାନ୍ ମୁସକୁପୁରତୁ ମୁସକୁ ସର୍ହାନ୍ ।

୪

ମିତ୍ ଗୁରୁତ୍

୧ ପବିତ୍ର ଆତ୍ମା ପୁରା ନେସନି ଖାଜା ଖେରସିନାତ୍ ଜେ, ଦୁବାଆମ୍ବାଦି ତାରଇ ସିକିୟାଦୁ ଆରଜି ଅର୍ଲେନ୍ ଏନ୍ ଏନ୍ କ୍ରିସ୍ତ ବିସ୍ବାସ୍ତାନ ଜନିଙ୍ଗ୍ ଆନିଙ୍ଗ୍ ଆନାତ୍ ।

୨ ଇକାର୍ ଏସ ଟକ୍ ନି ମିତ୍ ଖେରନିକାର୍, ଖାରି ବୁଦି ଖେତାଦୋ ନିରୁ ଆତାମାନାତ୍ ।

୩ ପେଡ଼ି କିନିକା ମାରି ଜନି ଜନି କାଦିଙ୍ଗ୍ ଉଣିକା ନେଗେନ୍ସିଲେଡ଼ ଜଜି ଖାର୍ ଖେରସିନାର୍ । ମାତର୍ ଆମା କ୍ରିସ୍ତ ବିସ୍ବାସ୍ତାନ ସତ୍ ତିଆର୍ କିତାମାନାନ୍, ଖାର୍ ମାପୁରୁ ତିଆର୍ କିତିମାନିକା ଉଣି କାଦି ଉଣିଙ୍ଗ୍ ଖାନିଙ୍ଗ୍ ଦନ୍ୟବାଦ୍ ସିଜି ଆକା ଖେଡ଼ିକା ମୋନ୍ତାନ ଉନ୍ଶେ ଆର୍ନାର୍ ।

୪ ମାପୁରୁ ଆମାକା ତିଆର୍ କିତାମାନାନ୍, ଆୟାଞ୍ଜି ନେଗିକା, ଆବେଶୁକୁ ଆମାକାବା ଅଲଗା ଆଦେଙ୍ଗ୍ ଆର୍ଏଡ଼ । ଖାନିଙ୍ଗ୍ ଦନ୍ୟବାଦ୍ ସିଜି ଖାନି ଞ୍ଜି ଦାନ୍ତିଙ୍ଗ୍ ଖେଡ଼ିକାଦାନ୍ ମାନାନିକା ମାନାତ୍ ।

୫ ଇରିଙ୍ଗ୍ ମାପୁରୁଦି ବାକ୍ୟ ମାରି ପାର୍ତାନାଦାନ୍ ଞ୍ଜି ବିସୟ ପବିତ୍ର ଆନାତ୍ ।

କ୍ରିସ୍ତ ଜିସୁଦି ନେଗି ସେବାକିନିକାନ୍

୬ ତିମତି, ଇୟାଞ୍ଜି ବିସୟ ନିନ୍ ତଡ଼ାନ୍ ନି ତାଙ୍ଗ୍ କାଙ୍ଗ୍ ସିକିୟା ସିତିଙ୍ଗ୍ କ୍ରିସ୍ତ ଜିସୁଦି ଅରେନ୍ ନେଗି ସେବା କିନିକାନ୍ ଆନି, ମାରି ନିନ୍ ଆମା ବିସ୍ବାସ୍ ମାରି ନେଗି ବୁଦିଦୁ ବୁଲ୍ଲାନିନି, ଆୟା ବିସୟତି ବାକ୍ୟଦାନ୍ ସାଲ୍ଲି ଆନି;

୭ ମାପୁରୁଙ୍ଗ୍ ଅପମାନ୍ କିଜି ଖାରଇ ମାଟେଙ୍ଗ୍ ଡିସ୍ସି, ମି ଦାମ୍ ଜିବନ୍ତିଙ୍ଗ୍ ବପୁ କିଦେଙ୍ଗ୍ ଅବ୍ୟାସ୍ କିଦୁ ।

୮ ଇରିଙ୍ଗ୍ ମୋନ୍ତଲି ବ୍ୟାୟାମ୍ତି ଦରକାର୍ ମାନାତ୍ । ମାତର୍ ଆମିକ ପୁରା କିଦେଙ୍ଗ୍ ଞ୍ଜିଦାନ୍ ନେଗେନ୍ ଆନାତ୍, ଇରିଙ୍ଗ୍ ଇୟାମାଣାନ୍ ଲୋକୁ ରୁଣ୍ଡି ବିସୟତାନ୍ ଇୟାଜୁଗ୍ତିଲୋକ୍ ମାରି ସାତି ଲୋକ୍ ଜିବନ୍ ଆଜି ତେବାନାନ୍ ଇଜି ବିସ୍ବାସ୍ ପୟତାମାନା ।

୯ ଇକା ପୁରା ସତ୍ତ୍ୱ ମାରି ଓଜେରେ ଇକା ତରିଷ୍ କିଜି ପୁରା ଜିବନ୍ତାନ ବିସ୍ବାସ କିନିକା ମାନାତ୍ ।

୧୦ ଆମା ରକିୟାକର୍ତ୍ତାମାନୁ ବିସ୍ବାସ କିତିଙ୍ଗ ଓଜେରେ ରକିୟା ପୟଦେଙ୍ଗ ଆବନାର୍, ଆୟା ଜିବନ୍ ମାପୁରୁମାନୁ ଆସା ଇଡ଼ଜି ମାଡ଼ ନିସା କାସୁ ବିସ୍ବାସ କିଜି ଇୟା ପାଣି କିଜି ସୋଲ୍‌ସିନାପ୍ ।

୧୧ ମିର୍ ଇୟାଓଜୁ ବିସୟ ମାଟା ସିଜି ଖାରିଙ୍ଗ ସିକିୟା ସିଦୁ ।

୧୨ ନି ନିଜେଦି ଖାରଗିନିକା, ବ୍ୟବହାର୍, ଜିବନ୍‌ନୋନିକା, ବିସ୍ବାସ ମାରି ପବିତ୍ରଦୁ ନେଗେନ୍‌ତାନ୍ ସେବା ତର୍ତ୍ତେଙ୍ଗ୍ ଆବ୍‌ତିଙ୍ଗ୍, ଉଣା ବୟସ୍ ଆତିମାରିଙ୍ଗ୍‌ବା ମିଙ୍ଗ୍ ଏନ୍ ସେମାର୍ କିଦେଙ୍ଗ୍ ଆବ୍‌ଏନ୍ ।

୧୩ ନାନ୍ ନି ଲାକ୍‌ତୁ ଖାନି ସାନ୍ ନିନ୍ଦୁ ଦାମ୍‌ସାସ୍ତ୍ର ପଡ଼ାନିକା, ଉପଦେସ୍, ସିକିୟାସିନି ପାଣି କିଜିମାନ୍‌ଆ ।

୧୪ ମଣ୍ଡଲିଦି ନେତାର୍ ମିଙ୍ଗ୍ ମାପୁରୁଦି ବାକ୍ୟ ଖେରସି ମି ମୁସ୍‌କୁ କିୟୁଇଡ଼ି ଖାଲେ ମିର୍ ଆମା ଅନୁଗ୍ରହଦି ଦାନ୍ ପୟତିମାନି, ତାନିଙ୍ଗ୍ ଖେଡ଼ା କିମାର୍ ।

୧୫ ନାନ୍ ରାସ୍‌ତିମାନିକା ଓଜୁ ପାଣି ଜିବନ୍‌ତି ଖାଲେ ମାନାଦେଙ୍ଗ୍ ଅବ୍ୟାସ୍ କିଦୁ ଖେନ୍‌କା ମି ପାଣିକିତି ଖେନ୍‌କା ଓଜେରି ଉଣ୍ଡିଙ୍ଗ୍ ଜାଗାର୍‌ତା ମାନ୍‌ଡୁ ।

୧୬ ନିଜେଦି ବିସୟତାନ୍ ମାରି ନିଜେଦି ସିକିୟା ବିସୟତାନ୍ ଜାଗାର୍‌ତା ମାନ୍‌ଡୁ, ଇୟାଓଜୁ ବିସୟତାନ୍ ଲାଗେଆଜି ମାନ୍‌ଡୁ, ମାତର୍ ଆକା କିତିଙ୍ଗ୍ ମିର୍ ନିଜେ ପରିତ୍ରାଣ ପୋଇନିଦେର୍ ମାରି ମିର୍ ଆଇଖାରିଙ୍ଗ୍ ରକିୟା ବା ପୁରା କିନିଦେର୍ ।



ବିସ୍ବାସ୍‌ରି ଉଣ୍ଡିଙ୍ଗ୍ ପାଣି

୧ ତକ୍ରାଦାଦାରିଙ୍ଗ୍ ବୁବାଖାଜା ଅଡ଼ବିଦୁ, ମାତର୍ ଖାରିଙ୍ଗ୍ ଲାଗାଏଣ୍‌ଗା ନେଗେନ୍‌ତାନ୍ ମାନାଦୁ । ମୁରୁଲିଆଙ୍ଗ୍ ଉଣ୍ଡିଙ୍ଗ୍ ତଡ଼ାନ୍ ଖାଜା ବ୍ୟବହାର୍ କିଦୁ ।

୨ ତକ୍ରାବିବିକାଙ୍ଗ୍ ଯାୟାଖାଜା ମାରି ଆଇଲିକଡ଼କାଙ୍ଗ୍ ତାଙ୍ଗ୍‌କି ଖାଜା ଅଡ଼ବିଜ ଖାନିକା ଉଣ୍ଡିଙ୍ଗ୍ ପବିତ୍ର ଖାଜା ମିର୍ ବ୍ୟବହାର୍ କିଦୁ ।

୩ ଅରେଡ଼ନେ ଆଜି କାକୁତ୍ ଦାନ ସାଲାଜିମାନି ରାଣ୍ଡିଆଇମେକାଙ୍ଗ ଜାତୁନ୍ ଅତୁ ।

୪ ମାତର୍ ଏସକାଙ୍ଗ ଆମା ରାଣ୍ଡିଆଇମାଦି କଡ଼ ନି ଆଇଲିକଡ଼, ମାରିଙ୍ଗ, ଆରଡିଙ୍ଗ ଝାର ଆଗଡିନେ ନିଜେଦି ଇଲୁପରିବାର ଉଣ୍ଡିଙ୍ଗ ଜିବନ୍ନୋନିକା ତରଡେଙ୍ଗ୍ ମାରି ଯାୟାବୁବା ଉଣ୍ଡିଙ୍ଗ ଜିବନ୍ନୋନିକା ସିକିୟା କିଦୁ; ଇରିଙ୍ଗ ଇକା ମାପୁରୁଦି କାଣକାଙ୍ଗ ନେଗିକା ଆନାଡ଼ ।

୫ ଆମା ରାଣ୍ଡିଆଇମା ସଡ଼ତାନ୍ ଅରେଦେ ମାରି ସିଲିସାଡିକାଡ଼, ଝାଦ ମାପୁରୁ ଆସା ଇଡ଼ଜି ଝେଡେନାଡ଼ା ମାଡ଼ିସକିଜି ମାରି ପାରତାନାଦାନ୍ ଡେବାପିଡ଼ ।

୬ ମାତର୍ ଏଦ ରାଣ୍ଡି ଆଡିଙ୍ଗବା ଝେଡିକାଦାନ୍ ଦିନକାଟେକିଜିନାଡ଼, ଝାଦ ଜିବନ୍ ମାରିଙ୍ଗବା ସାଡିକାଡ଼ ଇଜି ଅଡ଼ବିଦେଙ୍ଗ୍ ଆନାଡ଼ ।

୭ ରାଣ୍ଡିଆଇମେକାଙ୍ଗ ଇୟା ବିସୟତାନ୍ ଜାଗରାଡ଼ା କିଦୁ, ଏନ୍ ଏଣ୍ଡେସ୍ ଝାନିକା ବିରୁଦତାନ୍ ଇନି ମାଟା ଝେଡେଙ୍ଗ୍ ସାରି ପୟଏନ୍ ।

୮ ମାତର୍ ଜଦି ଏନ୍ ନିଜେଦି ଲୋକାଙ୍ଗ, ନିଜେଦି ଇଲୁପରିବାରଡିଙ୍ଗ ଜାତୁନ୍ କିଏନ୍, ଝାନ୍ ଦାମ୍ବୁ ବିସବାସଡିଙ୍ଗ ମାନାଏଜିନାନ୍ ମାରି ଝାନ୍ ଅବିସବାସିରି ମାଣୁକୁ ନାଣୁ ନିୟାଆଜିନାନ୍ ।

୯ ଇୟାନାନି ଜଗ୍ ମାନି ରାଣ୍ଡିଆଇମେକାଙ୍ଗ ଉନ୍ତୁ ଦାଡ଼ି କିଦୁ ଆମାଝାନିକା ବୟସ୍ ସାଟେ ବାର୍ସେକ୍ତାନ୍ ମୁସ୍କୁ ଆନାଡ଼, ଆଇମେକ୍ ଉନ୍ତେଦେବା ମାତର୍ ପେଡ଼ି ଆନେମାନେ,

୧୦ କଡ଼ରି ନେଗେନ୍ ଜଡ଼ନ୍ ଅନିକା, କୁଡ଼ାଆଙ୍ଗ୍ ସନ୍ମାନ କିନିକା, କ୍ରିସ୍ତାନ୍ ତଡ଼ାନ୍ ତାଙ୍ଗ୍ କା ଉଣ୍ଡିଙ୍ଗ ସାନ୍ତିଦାନ୍ ବ୍ୟବହାର କିନିକା, ସିଲିସାଡି ଲୋକାଙ୍ଗ ସାହାଜ୍ୟ କିନିକା ଇନି ଇନିକା ଝିକୁ ସଡ଼ପାଣି ଉଣ୍ଡିଙ୍ଗ ଆମାକାର କୁଟୁମ୍ବୁ ଝେଙ୍ଗ୍ ନା ମାନାର୍ ।

୧୧ ମାତର୍ ଉଣା ବୟସ୍ତି ରାଣ୍ଡିଆଇମେକାଙ୍ଗ ଇୟା ଦାଡ଼ିଦୁ ଇଡ଼ମାଟ୍; ଇରିଙ୍ଗ ଝାକୁ ମେନ୍ଦଲୁଡ଼ ଲାଲାୟ ଆଜି କ୍ରିସ୍ତଦି ମାଣାନ୍ ଝେରଏ ଆଜି ପେଡ଼ି ଆଦେଙ୍ଗ୍ ବଦା କିନେ;

୧୨ ମାରି ଝାକୁ ଝାନିକା ଆଗଡ଼ିରି ପାରମାଣ୍ ମାନାଉଡେ ଆକା ଦଣ୍ଡ ପୟନେ ।

୧୩ ମାରି ବା ଖାକୁ ଇଲୁକୁ ଇଲୁକୁ ବୁଲାଇ ସମୟ ଉପକା କିନେ, ମାତର ନାଶ୍ଟ ନାମକ କାତେଙ୍ଗ ମାରି ଆଇ ଲୋକା ସୁରି ମାଟା ଖେରସି ତାରୁଇ ମାଟେଙ୍ଗ ଓଡୁ ଖେରନେ ।

୧୪ ମାରି, ଉଣା ବୟସତି ରାଣ୍ଡିଆଇମେକ୍ ପେଡି ଆପିଓ, କଡ ଜନମ୍ କିପିଓ, ଇଲୁ ପାଣି ନେଗେନ୍ତାନ୍ ସାଲା କିପିଓ, ନିନ୍ଦା କିନି ଉଣ୍ଡିଙ୍ଗ ସାତୁଦିଙ୍ଗ ଇନି ସାରି ସିମାକିଓ ।

୧୫ ଇଲେଇବା ଏସଲୋକ୍ ରାଣ୍ଡିଆଇମେକ୍ ସୟତାନ୍ତି ଖେନ୍କା ଆଜି ସାରିବାଣାତେ ମାନେ ।

୧୬ ଜଦି ଆମା ବିସବାସତି ଆଇମା ଇଲୁଦୁ ରାଣ୍ଡିଆଇମେକ୍ ତେବାନେ, ଆଡତିଙ୍ଗ ଖାନିକା ଦୁଃକତି ବୋଜୁ ନିଜେ ପିଣ୍ଡିଓ, ମାରି ଏଣେସ୍ ମଣ୍ଡଲି ଇୟାଖାନିକା ଉଣ୍ଡିଙ୍ଗ ବେକାର ବୋଜୁ ଆମାକିତି, କାକୁତ ରାଣ୍ଡିଆଇମେକାଙ୍ଗ ଜାତୁନ୍ ଅତେଙ୍ଗ ଆଟନାଡ ।

୧୭ ଆମା ନେତାର ନେଗେନ୍ତାନ୍ ଜାତୁନ୍ କିନାର, ଆମାକାର କାସ୍ତୁ ପୟଜି ବାକ୍ୟ ଖେରନାର ମାରି ସିକିୟା ପାଣି କିଜିମାନାର, ଖାର ଦୁଇ ଗୁଣୁ ମୁସକୁ କାସ୍ତୁ କିତିକା ପୟନାର ।

୧୮ ☆ଇରିଙ୍ଗ ଦାମ୍ବୁସାସ୍ତ୍ର ଖେରନାଡ : “ପାସି ଉଣ୍ଡା କିଜିମାନିଝାଲେ କତି ଖେୟୁଦୁ ନାସୁ ତରମାଟ ।” ମାରି “ପାଣିକିନିକାନ୍ ଟିକ୍ତାନ୍ ପାଣିକିତିକା ପୟଦେଙ୍ଗ ଆଟନାନ୍ ।”

୧୯ ରିଏର୍ ବା ମୁଏର୍ ଲୋକ୍ ସାକି ସିଲେଏଣ୍ଟା ମଣ୍ଡଲିଦି ଅରେନ୍ ପେରି ନେତା ବିରୁଦତାନ୍ ଇନି ମାଟା ବିଚାରୁଆମାଟ ।

୨୦ ଆମାକାର ସଡତାନ୍ ପାପ୍ ପାଣିଦୁ ମାନାର, ଆଇଝାରିଙ୍ଗ ଜାଗାରତା କିନି ଉଣ୍ଡିଙ୍ଗ, ଝାରିଙ୍ଗ ନେସନିଝାଜା ସେତା କିଦୁ ।

୨୧ ମାପୁରୁଦି କ୍ରିସ୍ତ ଜିସୁଦି ମାରି ଆସକିତି ମୁସକୁପୁରତି ଦୁଡକା ଆଗଡି ନାନ୍ ତାଟତାନ୍ ମାଟା ଖେରସିନା, ମିର ଆଗଡିରି ଇସାବତାନ୍ ସାଲାଏଣ୍ଟା ଇୟାଓଡୁ ମାନାଦୁ, ମାରି ଏ ବିରୁଦତାନ୍ ମକମ୍ ସୁଡୁଜି ଇନି ପାଣି କିମାଟ ।

୨୨ ତରବର୍ ଆଜି ଏ ମୁସକୁ କିୟୁ ଇଡୁଜି ସର୍ପେ କିମାଟ, ଆଇଝାରି ପାପ୍ତୁ ନିଜେଦିଙ୍ଗ ମିସା କିମାଟ; ମିର ନିଜେଦିଙ୍ଗ ପୁରା ପବିତ୍ର ଇଡୁଦୁ ।

୨୩ କେବଳ ଏରୁ ଉଣୁଏଣ୍ଟା, ମି ଜିରାନିସାଲି ପିରିସ୍ କିଦେଙ୍ଗ ଉବୁଡିନେ ମାତର୍ ଅଙ୍ଗୁରରସ୍ ଉଣୁଆ, ଇରିଙ୍ଗ ନିନ୍ ଜାରିଦିଙ୍ଗଜାରି ନବ୍ ଆଜିନି ।

୨୪ ଏସଲୋକ୍ ପାପ୍ପାଣି ଝିଜୁଲୋକାମାନୁ ଝେଙ୍ଗ୍ ନାଡ୍, ଝାର୍ ଆୟାଉଣ୍ଡିଙ୍ଗ୍ ଦାପ୍ରେନେ ବିଚାରୁତୁ ସାମ୍ନା ଆଦେଙ୍ଗ୍ ପଡାନାଡ୍ । ମାରି ଏସଲୋକ୍ ପାପ୍ପକିତିକାର୍ ନାଣୁ ଦିନ୍ତାନ୍ ଦରାପଡେ ଆନାର୍ ।

୨୫ ଆୟାଝାଜା ଏସଲୋକ୍ ଦି ଦାମ୍ବୁପାଣି ଉସାସ୍ତାନ୍ ଝିଜେରେ ସୁଡନ୍ନାର୍, ମାତର୍ ମାରି ଏସଲୋକା ସଡ୍ପାଣି ଆୟାଝାଜା ନେସ୍‌ଇତିଙ୍ଗ୍ ବା, ଝିଜୁଦିନ୍ତିଙ୍ଗ୍ ମାର୍ଗିଜ ମାନ୍ତ୍ରେଙ୍ଗ୍ ଆବ୍‌ଏଡ୍ ।



୧ କ୍ରିସ୍ତନ୍ ବିସ୍ବାସସିର୍ ପାଣିକିନିକାର୍ ମାଲିକାଙ୍ଗ୍ ନିୟମ୍‌ତାନ୍ ସନ୍ମାନ୍ ସିପିର୍ । ଆର୍ତିଙ୍ଗ୍, ମାପୁରୁଦି ବିରୁଦ୍‌ତାନ୍ ମାରି ମା ସିକିୟା ବିସୟ୍‌ତାନ୍ ଏନ୍ ଇନି ନିନ୍ଦା କିଦେଙ୍ଗ୍ ଆବ୍‌ଏନ୍ ।

୨ ମାରି ଆମାଝାରି ମାଲିକକୁ ବା କ୍ରିସ୍ତବିସ୍ବାସସିର୍, ଝାର୍ ମାଲିକାଙ୍ଗ୍ ତଡାନ୍‌କୁ ନି ତାଙ୍ଗ୍ କି ଇଜି ଅଡ୍‌ବିଜି ଝାରିଙ୍ଗ୍ ନେଗେନ୍‌ତାନ୍ ସନ୍ମାନ୍ ସିଦେଙ୍ଗ୍ ଗାଡିଆ ଆମାକିର୍ ମାରି ନାଣୁ ଜାତୁନ୍‌ଦାନ୍ ଝାରି ସେବା କିପିର୍, ଇରିଙ୍ଗ୍ ଆମାକାର୍ ସେବାଦାନ୍ ଲାଡ୍ ପୟ୍‌ନାର୍, ଝାର୍ ବିସ୍ବାସସିର୍ ମାରି ନାଣୁ ଝେଡିକା ଲୋକୁ । ଇୟାଝିଜୁ ବିସୟ୍ ମିର୍ ସିକିୟା ସିଜି ପ୍ରଚାର୍ କିନିଦେର୍ ।

ବୁଲ୍ ସିକିୟା ମାରି ସଡ୍‌ତି ଦନ୍

୩ ଆମାକାର୍ ପ୍ରବୁ ଜିସୁ କ୍ରିସ୍ତଦି ସିକିୟାଦି ଝାଲେ ଅରଡ୍ ସିଲିକା ମାରି ମା ଦାମ୍ବୁ ସିକିୟାଦି ବିରଡ୍ କିଜିମାନି ଆଇଜାତିଦି ବାକ୍ୟ ପ୍ରଚାର୍ କିନାର୍,

୪ ଝାର୍ କେବଳ୍ ପଟାଦୁ କେଇନିକା ଡିସ୍‌ତିଙ୍ଗ୍ ମାରି ଇନିକା ସିଲେଏର୍ । ଝାର୍ ସାସ୍ତ୍ରଦି ଅରଡ୍‌କୁ ଅସି ଆଉଲି କିନାର୍; ଆବେଣୁକୁ କେବଳ୍ ଆକାର୍, ନାମ୍‌ଇକା, ସୁରିଝାର୍‌ଗିନିକା ମାରି ଗଣ୍ଡଗଲ୍ କିନିକା ଆନାଡ୍ ।

୫ ଖାର ବିସାର୍‌ସିଲିକା ଆଜି ବେକାର ଆସାନି ମାଣ୍ଡକୁ ସତ୍‌ତି ବିରୁଦ୍ଧ କିନାର । ଦାମ୍ଭୁବିସ୍‌ବାସ୍‌ତିଙ୍ଗ କେବଲ୍ ଦନି ଆନିକା ଉଣ୍ଡି ଉପାୟ ଇଜି ଖାର ଅଡ୍‌ବିନାର ।

୬ ଦମ୍‌କିନି ଲୋକୁ ସତ୍‌ତାନ ଦନି, ଇରିଙ୍ଗ୍ ଖାନିନ୍‌ ଏସ ମାନାଡ୍, ନାସ୍‌ଦାନନେ ଖାନ୍ ଖେଡ୍‌କା ମାନିନ୍ ।

୭ ଇରିଙ୍ଗ୍ ମାଡ୍ ଇୟା ଦୁନିଆଦୁ ଇନିକା ଆସ୍‌ସି ଖାତିମାନିକା ? ଇନିକା ସିଲେ । ମାରି ଇବେଣ୍‌କୁ ଅର୍‌ସେ ଇନିକା ଆସ୍‌ସି ଡେସିସନିକା ? ଇନିକା ସିଲେ ।

୮ ଆର୍‌ଡିଙ୍ଗ୍, ମାଙ୍ଗ୍ ଉଣିକା ନି ଆରାନିକା ନିଜେଦିବାତି ଆଦେଙ୍ଗ୍‌ଆର୍‌ଡିଙ୍ଗ୍, ଇକା ମା ଉଣ୍ଡିଙ୍ଗ୍ ନାଣ୍ଡ ସିଲେ ନୋ ?

୯ ମାତର୍ ଦନ୍‌ସ୍‌ମ୍‌ତିଦିଙ୍ଗ୍ ଆସା ଲୋକ୍‌ଡିଙ୍ଗ୍ ଗାଦି ପରିକା ମାରି ଉରି ଲଇ ରେନାଅନାଡ୍; ଖାନି ମୋନ୍‌ଡୁ ଗାଦି ତାଗ୍‌ଇ ମାଟେଙ୍ଗ୍ ଆସା କିଜି ଖାନିଙ୍ଗ୍ ଦଂସ୍ ମାରି ସାନି ତରିନ୍ ତର୍‌ସି ଅନାଡ୍ ।

୧୦ ତାରୁଙ୍ଗ୍ ଲୋବ୍ ଝିଜୁ ଝିଜିନ୍ ମୁଲ୍ । ଆମାକାର୍ ଝିଜୁଦିନ୍ କେବଲ୍ ତାରୁଙ୍ଗ୍‌ଣି ଉପାୟ ପୟ୍‌ଜି ମାନାର୍, ଖାର ଦାମ୍ଭୁ ବିସ୍‌ବାସ୍‌ତିଙ୍ଗ ହାରାକିଦେଙ୍ଗ୍ ବାସ୍‌ନାର୍ ସାରାସାରିଝେନ୍‌କା କେବଲ୍ ଦୁଃକ୍‌ବୋଗ୍‌ତାନ ଖାରି ଜିବନ୍ ରୁଙ୍ଗ୍‌ନା ମାନାଡ୍ ।

ପାଉଲତି ସାରାସାରି ମାଟା

୧୧ ମାତର୍ ଏ ଡିମତି ମାପୁରୁଦି ଲୋକୁ, ଇୟା ଝିଜୁମାଣାନ୍ ନିନ୍ ଆକ ମାନ୍‌ଆ । ଦାମ୍ଭୁପାଣି, ମାପୁରୁ ଦାମ୍ଭୁ ଜିବନ୍ ବିସ୍‌ବାସ୍, ଜିବନ୍‌ନୋନିକା, ସାନ୍ତି ମାରି ସାସ୍ ଝିଜୁଦୁ ପୁରାଗୁଣ୍ଡତାନ୍ ପୁରାପୁରି ଆଦେଙ୍ଗ୍ ସେସ୍‌ କିଦୁ ।

୧୨ ବିସ୍‌ବାସ୍‌ତି ନେଗି ଜୁଦ୍ କିଜି ଏସକାଙ୍ଗ୍‌ଝିଜୁଇ ଜିବନ୍ ପୟ୍‌ଦୁ । ଇୟା ପାଣିଦୁ ଇନି ଉଣ୍ଡିଙ୍ଗ୍ ମିର୍ ବାସେଆତିମାନି ମାରି ଗାଦିଲୋକା ସାକିଙ୍ଗ୍ ଲୋଇ ଇକା ମାନାତିମାନି ।

୧୩ ☆ଝିଜେରି ଜିବନ୍‌ସିନି ମାପୁରୁଦି ଆଗ୍‌ଡି, ମାରି ପନ୍ତିୟ୍ ପିଲାଡ୍‌ଦି ଆଗ୍‌ଡି ତାଟ୍ ବିସ୍‌ବାସ୍‌ତାନ୍ ସାକିୟ୍ ସିତିମାନି ପ୍ରବୁ ଜିସୁ କ୍ରିସ୍‌ତି ଦର୍‌ତାନ୍ ନିଙ୍ଗ୍ ଆଦେସ୍ ସିଜି ଝେର୍‌ସିନା :

୧୪ ପ୍ରଭୁ ଜିସୁ କ୍ରିସ୍ତଦି ମାରିଡ଼େସିଝାନି ସାନ୍ଦି ନିଙ୍ଗୁ
ସିଆୟାଆତିମାନି ମାଟେଙ୍ଗୁଝିକୁ ବିସବାସତାନ୍ ମାନାଜି ନେଗେନ୍
ମାରି ନିନ୍ଦା ଆଏନ୍‌ଶ୍ଟା ତେବାଦୁ ।

୧୫ ଝାନି ମାରିଡ଼େସିଝାନିକା ନେଗି ସମୟ ଆସ୍ କିନାନ୍ ନିଜେ
ମାପୁରୁ ଦନ୍ୟ, ରାଜାରି ରାଜା ମାରି ପ୍ରଭୁରି ପ୍ରଭୁ, ମାରି ଅରେନ୍ ସାସନ୍
କିନିକାନ୍;

୧୬ ଝାନ୍ କେବଲ୍ ସାଏନ୍; ଲୋକାଦି ନେସଲ୍ ଜାୟ ରାଜିଦୁ ଝାନ୍
ବାସା କିନାନ୍; ଏନ୍ ଝାନିଙ୍ଗ୍ ସୁଡ଼ୁଏନ୍; ଏନ୍ ଏସକାଙ୍ଗ୍ ସୁଡ଼ୁଦେଙ୍ଗ୍
ଆର୍ଏନ୍ । ଝାନି ଗୌରବ୍ ମାରି ରାଜି ଜୁଗ୍ ଜୁଗ୍ ସାନ୍ଦି ମାନିଡ଼ ।

୧୭ ଇୟା ଦୁନିଆଦୁ ବିସୟତାନ୍ ଆମାକାର୍ ଦନି, ଝାରିଙ୍ଗ୍ ଆକାର୍
ଆଇଉଣ୍ଡିଙ୍ଗ୍ ଜାଗାର୍ତା କିଦୁ । ଝାରିଙ୍ଗ୍ ଆଦେସ୍ ସିଜି ଝେର୍ଡୁ,
ବେକାର୍ ଦନ୍‌ସମ୍ପତି ମୁସକୁ ଆସା ଇଡ଼ମାର୍, ଝାର୍ ଝିଜୁଦିନ୍ ମାପୁରୁଦି
ମୁସକୁ ଆସା ଇଡ଼ଦୁ । ତାନି ଝେନ୍‌କା ଜିଦେଙ୍ଗ୍ ଇଜି ମା ଝିଜୁ
ଦରକାର୍ତତି ବିସୟ ଝାନ୍ ମାଙ୍ଗୁ ସିନାନ୍ ।

୧୮ ସଡ଼ପାଣିଦୁ ଜାଡୁନ୍ ଆଜି ନେଗିଦନ୍ ଉଣ୍ଡା କିଦୁ; ଦାନ୍‌ସିଜି
ନିଜେଦି ପାଣିଦୁ ଆଇଝାରିଙ୍ଗ୍ ମିସା କିଦୁ ।

୧୯ ଆର୍ଡିଙ୍ଗ୍ ଇୟାଝାଜା କିଡିଙ୍ଗ୍ ଝାର୍ ଝାଜିନିଦିନ୍‌ଡି
ଉଣ୍ଡିଙ୍ଗ୍ ମୁଲ୍‌ଦନ୍ ନିଜେ ନିଜେଦି ଉଣ୍ଡିଙ୍ଗ୍ ଉଣ୍ଡା କିନାର୍ ମାରି
ସାରାସାରିଝେନ୍‌କା ଝାର୍ ସଡ଼ତି ଜିବନ୍ ପୟନାର୍ ।

୨୦ ଏ ଡିମତି, ନି ମୁସକୁ ସିଆୟା ଆତିମାନି ଦାଇଡ଼ ବିସବାସତାନ୍
ମାନେଆଆ । ଏନ୍ ଏନ୍ ଦାର୍ମୁସିଲି ନିର୍ଭୁଦି କାବାଦିଙ୍ଗ୍ “ବୁଦି” ଇଜି
ଅଡ଼ବିଜି ସଡ଼ତି ଦାର୍ମୁ ବିସବାସତାନ୍ ଝେର୍ଏ ଆଜିନାର୍ ଇୟା
ଝିଜୁମାଣାନ୍ ନିନ୍ ଆକ ମାନ୍‌ଆ

୨୧ ଏନ୍ ଏନ୍ ଝେଡ଼ା କିଜି ବିସବାସ୍ ବିସୟତାନ୍ ସାରିବାଣାତା
ମାନାର୍ । ମାପୁରୁ ମି ଝିଜେରିଙ୍ଗ୍ ଝାନି ଦୟା ସିପିନ୍ ।

ମାପୁରୁଦି ସବ୍ ବାକ୍ୟ

The New Testament in the Konda Porja Lanugage of India. Konda-Dora: ମାପୁରୁଦି ସବ୍ ବାକ୍ୟ (Bible)

copyright © 2020 The Word for the World International and Konda Porja Translation Samithi, Dasamanthpur, Odisha

Language: Konda Porja (Konda-Dora)

Contributor: The Word for the World South Asia

ମାପୁରୁଦି ସବ୍ ବାକ୍ୟ

ପୁନି ନିୟମ, 2020

The New Testament in Konda Porja Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-07

PDF generated using Haiola and XeLaTeX on 6 May 2025 from source files dated 7 May 2025

506ae627-08e2-556a-b39e-5315f886d95a